

A le tose che se lagna che i afari ghe va mal

*Che 'l sia un momento critico
sto quà per tanta zente
no digo proprio gnente
nè fasso discussion.*

*Ma pur gh'è certe cocole
tosete per la strada
che come la sia stada
mi no me so spiegar.*

*'Na volta le vedevimo
sbrisete in savatine,
zalete mogroline
che fava compassion.*

*E adesso, mo cospessoli!
Blusetè ricamae,
calzete traforae,
le scarpe col nastrin.*

*El anca lore, caspita,
se lagna e se dispera
che in causa de la guera
i afari ghe va mal.*

*Che cresse anca el parsemolo,
le dise, i vovi, el late,
che solo le pignate
se trova a bon marcà.*

*ma in quanto po a nascondarve
ste brute baronsele
che cresse anca su ele
dei lussi a sensazion*

*le xe famose al massimo;
Ma za a 'na volpe fina
ghe basta un' ociadina
se se ghe verze el scial.*